

Liburutegia eta turismo bulegoa jarriko dituzte Zestoako Portalekoan

Udalak guztira hiru lokal eskuratuko ditu eta 360 metro karratu inguruko erabilera izango dute.

Zestoa. Construcciones Pagamuño, S.L.-k Portalekoa eraikineko hiru lokal emango dizkio Zestoako Udalari eta honek, liburutegia eta turismo bulegoa kokatuko ditu bertan, besteak beste.

Bi lokal beheko solairuan egongo dira eta 189 eta 34 metro karratu erabilgarri izango dituzte. Bi gune hauek bukatuta entregatuko dira, hau da, egokitze obrak amaituta egon ondoren. Bestalde, hirugarren lokala erdi sotoan egongo da eta erabilera anitzeko espazioa sortzeko asmoa agertu zuen Zestoako Udalak.

Alazne Olaizola alkateak (EAE) aurreratu zuenez, irisgarritasuna bermatzeko helburuarekin, Udalak eskuratuko dituen lokalen erabiltzaile ezinduek eraikin berriaren eskaileran kokatuko den igogailua erabili ahal izango dute solairu batetik bestera joateko. Helburu horrekin ateak irekiko dira lokal horietan igogailua kokatuko den espazio komunera heltzea ahalbideratuz.

EAJ-PNV taldeak bere desadostasuna azaldu zuen EAEk aurkeztutako proposamenarekin, Portalekoa ez zaielako herriko liburutegia kokatzeko gunerik egokiena iruditzen esanez.

"Ez gaude ados erabilpenarekin. Liburutegia gaur egun udaletxean dago eta nahiz eta kokapenik egokiena ez dela onartu, proposamen desberdinak jarri genituen mahai gainean, baina guztiei ezetza esan zitzaien. Hala ere, liburutegia ez dugu Portalekoan ikusten. Turismo bulegoa ondo iruditzen zaigun arren, 37 metro karratuko lokala txikiegia iruditzen zaigu", adierazi zuen Gorka Unanue bozeramaileak. >k.f.